

आकाशवाणीखबरां

1. पच्छिम बंगाल च बीजेपी सरकार नै अपना पैहला पूरा पराता बजट पेश कीता, समाज कल्याण, ढांचागत विकास ते कम्म रोजगार बक्खी विशेष ध्यान। 1 लक्ख असामियां पुर करने दी पेशकश।
2. भारत दी अध्यक्षता च ब्रिक्स मुखें दे राश्ट्री सुरक्षा सलाहकारें दी 2 रोजा बैठक अज्ज नमीं दिल्ली च शुरू होई।
3. विदेश मंत्री डा. एस जयशंकर अज्ज थमां मंगोलिया ते दक्खन कोरिया दे दौरे पर ना।
4. लखनऊ दे अलीगंज च इक 4 मंजला ईमारत च अग्न लगने कारण 15 जनें दी मौत, मारे गेदे च ज्यादातर विद्यार्थी, राश्ट्रपति ते प्रधानमंत्री होरें हादसे पर गैहरा दुख प्रगट कीता।
5. मौसम विभाग नै असम ते मेघालय च भारी बरखा दी पेशनगोई कीती ऐ।
6. ते फीफा विश्व कप च अज्ज ब्राजील नै हैती गी, मिस्र नै न्यूजीलैंड गी ते स्पेन नै साउदी अरब गी हराया।

&lt;&gt;&lt;&gt;&lt;&gt;&lt;&gt;&lt;&gt;

W.B Budget

पच्छिम बंगाल सरकार नै 2026-27 बरे लेई अपना पैहला पूरा पराता बजट पेश कीता। रोजगार ते आम लोकें दी भलाई बेहतर गी बढ़ावा दिंदे होई राज्य दे बक्ख-बक्ख मैहकमें च इक लक्ख खाली असामिएं गी भरने दा ऐलान कीता ऐ। पच्छिम बंगाल दे खजाना मंत्री स्वप्न दास गुप्ता होरें बजट पेश करदे होई आखेआ कि नौकरिएं च 33 प्रतिशत सीटां महिलाएं लेई आरक्षित होंगन। इंदे च टीचरें ते शिक्षा विभाग दे कर्मचारिएं लेई 50 जहार ते पुलसै च 20 जहार असामियां शामिल ना। तोआई, अग्नवीरें लेई लोड्डे मूजब 10 प्रतिशत दा आरक्षण शुरू कीता गेआ ऐ। एहदे अलावा सिविक वलंटियर, होम गार्ड, ग्रीन पुलस ते एन.वी.एम कर्मचारिएं गी दिते जाने आहले मासिक मानदेह च दो जहार रपे दा बाढ़ा कीता गेआ ऐ। कोलकाता क्षेत्र लेई कल्याणी कश इक नमें ग्रीन फील्ड ब्हाई अड्डे दा बी प्रस्ताव इस बजट च रखेआ गेआ ऐ। बजट च 2 प्रमुख रक्षा केंद्रें दे विस्तार ते विकास च मदद लेई हासीमारा एयर फोर्स स्टेशन गी 25 एकड़ ते कलाईकुंडा एयर फोर्स स्टेशन गी 37 एकड़ जमी सौंपे दा बी प्रस्ताव ऐ।

&lt;&gt;&lt;&gt;&lt;&gt;&lt;&gt;&lt;&gt;

Prez. Kuno

राश्ट्रपति द्रौपदी मुर्मू होरें अज्ज मध्य प्रदेश दे यशेपुर जिले च कूनो नेशनल पार्क च चीता मित्रें ते सहरिया जनजाती दे लोकें कन्नै गल्लबात कीती। उनें प्रोजेक्ट चीता च उंदे योगदान दी सराहना कीती ते आखेआ कि इस महत्वाकांक्षी संरक्षण कार्यक्रम दी कामयाबी च मकामी समुदायें दा बड़ा महत्व आहला योगदान ते भूमिका ऐ। उनें आखेआ कि एह लोक चीतें दे बचाव ते संरक्षण च अहम रोल निभा करदे ना। एहदे शा पैहले द्रौपदी मुर्मू होरें कूनो नेशनल पार्क च सफारी कीती ते चीजा पुर्नवास परियोजना दी प्रगति ते स्थिति दा जायजा लैता। उनें कमान एड कंट्रोल केंद्र दा बी दौरा कीता ते प्रोजेक्ट चीता बारै उत्थै लग्गी दी नमैश बी दिक्खी। एहदे अलावा राश्ट्रपति होरें जानवरें पर तक्क रखने आहले सरिस्ते, पशु कुत्थै न उंदा पता लाने आहली ट्रैकिंग प्रणाली ते उंदा संश्रवण लेई कीते जा'रदे हीलें बारै बी तफसीली जानकारी हासल कीती। अधिकारिएं उनेंगी दस्सेआ जे भारत च एल्लै 52 चीजे न जिंदे चा 49 कूनो नेशनल पार्क च ना। प्रोजेक्ट चीता दी शुरूआत प्रधानमंत्री नरेंद्र मोदी होरें 2022 च नामीबिया थमां आंदे गेदे 8 चीतें गी कूनो नेशनल पार्क च छोड़ियै कीती ही। ओहदे बाद अफ्रीका ते वोत्सवाना थमां बी किश चीते आंदे गे हे।

&lt;&gt;&lt;&gt;&lt;&gt;&lt;&gt;&lt;&gt;

BRICS

भारत दी अध्यक्षता च ब्रिक्स मुखें दे राश्ट्री सुरक्षा सलाहकारें दी दो दिनें दी बैठक अज्ज नमीं दिल्ली च शुरू होई। उच्ची सतह दी इक बैठक दी प्रधानता भारत दे राश्ट्री सुरक्षा सलाहकार अजीत डोभाल करा करदे ना। एह बैठक सितंबर 2026 च होने आहले मुख ब्रिक्स सम्मेलन लेई निगगर बुनियाद तैयार करोगा। दो दिनें दी इस बैठक दा विशेषार ऐ अज्ज दुनिया दे सामने मजूद गैर रिवायती सुरक्षा चुनौतियां जेदे पर सब्बै मिम्बर मुख गैहराई कन्नै सोचबचार करै करदे ना। आर्टिफिशल इंटेलीजेंस कन्नै जुड़े दे खतरें, साइबर सुरक्षा ते डिजिटल कमिएं

खामिएं दे बारे च विशेषतौरा पर चर्चा इनें दो दिनें दरान कीती जा'रदी ऐ। एहदे कन्नोकन्नी रूस, यूब्रेन युद्ध, पच्छिम एशिया संकट ते आतंकवाद दी समीक्षा बी इस बैठक च कीती जा'रदी ऐ।

<><><><><><>

## Jaishankar Mangolia

विदेश मंत्री डा. एस जयशंकर होर अज्जै थमां मंगोलिया ते दक्खन कोरिया दी जात्तरा पर न। विदेश मंत्रालय मूजब मंगोलिया दौरे दरान विदेश मंत्री बी बत्तसेत्सेग हुंदे कन्नै दपक्खी गल्लबात कीती। अपने सोशल मीडिया पर जयशंकर होरें दस्सेआ जे गल्लबात दरान दौनें मुल्खें बश्कार बपार ते आर्थिक सांझेदारी सने होई केई विशें पर विचार बटांदरा कीता गेआ। ओहदे बाद ओहू 24 ते 25 जून गी दक्खन कोरिया दे दौरे पर होंगन। इस दरान उंदी दक्खन कोरिया दे विदेश मंत्री चो ह्यून हुंदे कन्नै मलाटी ते गल्लबात होगा।

<><><><><><>

## MoS-CISF

केंद्री गृह राज्यमंत्री संजय कुमार होरें अज्ज देश दे विकास च केंद्री उद्योगिक सुरक्षा बल सी.आई.एस.एफ दी अहम भूमिका गी उजागर कीता। नमीं दिल्ली च सी.आई.एस.एफ दे मुख्यालय दी ईमारत दा नीह पत्थर रखने ते ई उद्घाटन समारोह दरान उनें आखेआ कि सी.आई.एस.एफ दे जवान देश दी तरक्की गी सुरक्षित रखने आहले आर्थिक सेना दे रूपै च कम्म करदे न। उनें जवानें दी भलाई बेहतरी लेई केंद्री गृह मंत्रालय आसेआ मंजूर कीते गेदे केई ढांचागत निर्माण, तकनीकी सुधार ते ऐतिहासिक कल्याणकारी उपाएं दी घोशणा बी कीती। मंत्री होरें सी.आई.एस.एफ दे प्रोजेक्ट मन दी सिफत कीती। प्रोजेक्ट मन ज्हारें जवानें ते उंदे परिवारें गी मानसिक तौरा पर नरोआ रखने लेई सलाह परामर्श उपलब्ध करांदा ऐ जेदे नै सी.आई.एस.एफ दे जवानें ते उंदे परिवारें च जेकर कुसै गी कोई मानसिक या मनोवैज्ञानिक विकार होऐ तां ओहदा नबेड़ा इस प्रोजेक्ट दी मदद कन्नै कीता जंदा ऐ।

<><><><><><>

## Starmer Resign

बरतानिया दे प्रधानमंत्री कीर स्टारमर होरें अज्ज अपने औहदे परा इस्तीफा देने दा ऐलान करी दित्ता ऐ। लेबर पार्टी दे अंदर 100 कोला मते सांसदें दी बगावत, मकामी चुनाएं च जबरदस्त हार ते हालिया रक्षा बजट विवाद दे बाद उनें एहू फैसला लैता ऐ। उआं ओहू नमें नेता दे चुने जाने तगर कम्म चलाऊ यानि कार्यवाहक प्रधानमंत्री दे रूपै च कम्म करदे रौहडन। उंदे इस्तीफे दे पिच्छे दे कारणें दी जेकर गल्ल करचै तां पिछले किश अरसे थमां उंदे पर काफी दबाव बनाया जा'रदा हा। 100 कोला मते सांसदें उंदे खलाफ मोर्चा खोली दित्ता हा। मई 2026 दे मकामी निकाएं दे चुनाएं च लेबर पार्टी गी इक जहार कोला मतियें सीटें दा नुकसान झल्लना पेआ।

<><><><><><>

## Lakhnow-Fire

उत्तर प्रदेश दी राजधानी लखनउ दे अलीगज थाने हेठ पौंदे पुरनिया सेक्टर डी च इक त्रै मंजला ईमारत च अग्न लगाने करी कोई 15 लोकें दी मौत होई गई ऐ जिंदे च ज्यादातर विद्यार्थी न। इस हादसे च केई लोकें दे घायल होने दी बी खबर ऐ। इस ईमारत च इक गोदाम, इक पेटशाप, इक टटोरियल ते लाइब्रेरी ते इक थारी डी आर्ट प्रोडक्शन स्टूडियो हा। शुरूआती जांच थमां पता लग्गा ऐ जे अग्न ईमारत दी बेसमेंट च ए.सी दे शर्टसर्किट कारण लग्गी ते मगरा पूरी ईमारतै च फैली गई। मुख्मंत्री योगी आदित्यनाथ एहू खबर सुनदे गै अपने सारे कार्यक्रम रद्द करियै लखनउ पुज्जे, स्थिति दा जायजा लैता ते घायलें दी डौल पुच्छी। राष्ट्रपति ते प्रधानमंत्री होरें हादसे पर गैहरा दुख प्रगट कीता।

<><><><><><>

## NTA-Rejects claim

राष्ट्री परीक्षा एजेंसी एनटीए नै नीट यू.जी 2026 पुर्नपरीक्षा दा कोशन पेपर लीक होने दे दावे गी खारज कीता ऐ। सोशल मीडिया पर प्रसारित इक वीडियो च नीट दा पेपर टेलीग्राम पर लीक होने दा दावा कीता गेदा हा। एनटीए नै आखेआ ऐ कि एहू स्तेयान सख्त सुरक्षा प्रबंधें हेठ पूरी कामयाबी कन्नै तोड़ चाड़ेआ गेआ ऐ। एजेंसी नै आखेआ ऐ कि गलत जानकारी फैलाने आहलें खलाफ साइबर अपराध केंद्र ते होरनें एजेंसिएं दे सहयोग कन्नै कार्रवाई कीती जा'रदी ऐ।

<><><><><><>

## **IMD Weather**

मौसम विभाग नै असम ते मेघालय च अज्ज मौलाधार बरखा पौने दा रेड अलर्ट जारी कीता ऐ। विभाग मूजब अरुणाचल प्रदेश- पच्छिम बंगाल दे तराई आहले इलाकें ते सिक्किम च बी अज्ज तेज बरखा पौने दी संभावना ऐ। मौसम विभाग नै दस्सेआ जे बिहार- ओडिशा- आंध्र प्रदेश- कर्नाटक- केरलम- माहे-कोकण-गोवा ते लक्षद्वीप च कल्लै तगर तेज बरखा दा अनुमान ऐ। तमिलनाडू- तेलंगाना- पुद्दुचेरी- कराईकल- नागालैंड- मणिपुर- मिजोरम ते त्रिपुरा दे किश हिस्सें च बी ऐसी गै स्थिति बनी रौहने दी संभावना ऐ। दिल्ली- पंजाब-हरियाणा- चंडीगढ़- उत्तराखंड- हिमाचल/प्रदेश- महाराष्ट्र- छत्तीसगढ़- मध्य प्रदेश- जम्मू/कश्मीर ते लद्दाख दे किश क्षेत्रें च अज्ज तेज हवा ते गरज कन्नै बरखा होने दी संभावना ऐ। इस दौरान विदर्भ च अगले त्रै-दिन तगर लू चलने दा अनुमान ऐ।

<><><><><><>

## Jharkhand Lighting

झारखंड च पिछले 24एं घंटें दरान श्मानी बिजली पौने दिएं घटनाएं च घटोघट्ट 8 लोकें दी मौत होई गेई ऐ ते 12 कोला मते दे घायल होने दी खबर ऐ। बिजली पौने दियां घटनां रामगढ़, गिरीडीह, खूंटी देवधर, धनबाद ते साहिबगंज जिले च पेश आइयां न। इनें घटनाएं च मरोने आहलें च सीपीआई दे इक नेता, इक वार्ड मिम्बर, इक करसान ते इक होर नागरिक शामिल न।

<><><><><><>

## **Manipur-PLA Arrest**

गोवा पुलस दी अपराध शाखा नै मणिपुर च सक्रिय विद्रोही संगठन पीपल्स लिबरेशन आर्मी दे इक मिम्बर गी गिरफ्तार करी लैता ऐ जेड़ा बंधश लग्गे दे इस संगठन दा इक सक्रिय मिम्बर हा ते पिछले कोई 2 दहाकें थमां फरार हा। एहदी पंछान नोंग थोंग बम इंगो दे रूपै च कीती गेई ऐ जिसी कृष्णा ते लाल दे नां कन्नै बी जानेआ जंदा हा। पुलसै दे बड्डे अधिकारिएं जानकारी दिती ऐ जे इंगो पीएलए दा आपूं बनी बैठक दा लेफ्टिनेंट कर्नल हा जिसी इक टकोहदी सूह थोने दे बाद बकायदा इक सोची समझी प्लेनिंग कन्नै गिरफ्तार कीता गेआ। एहू अभियान फतोरदा मझगांव इलाके च चलाया गेआ।

<><><><><><>

## **T.N-Assembly**

तमिलनाडू विधानसभा च अज्ज कर्नाटक दी प्रस्तावित मेकेदातू डैम परियोजना पर चर्चा होई। ए.आई.ए.डीएम.के, पी.एम.के ते सी.पी.एम सने सभनें बरोधी पार्टिएं एहदे पर शैंका प्रगट कीती कि इस परियोजना कन्नै कावेरी जल बंटवारे पर माड़ा असर पेई सकदा ऐ जेदे नै तमिलनाडू दे हितै पर असर पेई सकदा ऐ। राज्य सरकार कन्नै परियोजना दे बरोध च अपना राँ दोहरांदे होई आखेआ ऐ कि तमिलनाडू दे जल सरबंधी अधिकारें लेई सरकार पूरी चाल्ली दृढ़ संकल्प ऐ। सरकार नै मेकेदातू जल न्यायाधिकरण दे गठन दी मंग कन्नै जुड़े दे विधानसभा दे आम सहमति कन्नै पास होए दे प्रस्ताव दा बी जिक्र कीता ते आखेआ कि तमिलनाडू दे अधिकारें कन्नै कोई समझौता नेई कीता जाहगा।

<><><><><><>

## Modi Bhawana Ben Death

प्रधानमंत्री नरेंद्र मोदी होरें दादरा ते नगर हवेली ते दमन ते दीव केंद्र शासित प्रदेश दे प्रशासक प्रभुभाई पटेल हुंदी घरे आहली भावनाबेन पटेल हुंदी मौती पर गैहरा दुख प्रगट कीता ऐ। अपनी इक सोशल मीडिया पोस्ट च मोदी होरें आखेआ कि उंदा इस परिसर कन्नै बड़ा नेडमा ते सौहार्द आहला सरबंध रेहा ऐ। मोदी होरें सोगी परिवार कन्नै हमदर्दी प्रगट करदे होई सुर्गवासी दी आत्मा दी शांति लेई प्रार्थना कीती।

<><><><><><>

## FIFA

ते हून खबरां फीफा विश्व कप दिया। फीफा विश्व कप 2026 दे ग्रुप स्टेज दे दिलचस्प मकाबले अमरीका कनाडा ते मैक्सिको च जारी न। ताजा जानकारी मूजब ब्राजील नै हैती गी 3-0 कन्नै हराइयै अपनी नाकआउट दियां मेदां मजबूत कीतियां न। मिस्र नै न्यूजीलैंड गी 3-1 कन्नै हराइयै विश्व कप च अपनी पैहली ऐतिहासिक जित्त दर्ज कराई ऐ ते उरुग्वे ते केव वर्दे बश्कार मकाबला 2-2 दी बरोबरी पर विजन हार जित्त दे फैसले दे ड्रा रेआ ते स्पेन नै शानदार प्रदर्शन करदे होई साउदी अरब गी 4-0 कन्नै हराई दित्ता ऐ। अज्ज राती अर्जेंटीना दा मकाबला आस्ट्रिया कन्नै।

<><><><><><>